



Early Journal Content on JSTOR, Free to Anyone in the World

This article is one of nearly 500,000 scholarly works digitized and made freely available to everyone in the world by JSTOR.

Known as the Early Journal Content, this set of works include research articles, news, letters, and other writings published in more than 200 of the oldest leading academic journals. The works date from the mid-seventeenth to the early twentieth centuries.

We encourage people to read and share the Early Journal Content openly and to tell others that this resource exists. People may post this content online or redistribute in any way for non-commercial purposes.

Read more about Early Journal Content at <http://about.jstor.org/participate-jstor/individuals/early-journal-content>.

JSTOR is a digital library of academic journals, books, and primary source objects. JSTOR helps people discover, use, and build upon a wide range of content through a powerful research and teaching platform, and preserves this content for future generations. JSTOR is part of ITHAKA, a not-for-profit organization that also includes Ithaka S+R and Portico. For more information about JSTOR, please contact support@jstor.org.

XVII. *Dissertatio epistolaris de Ossibus et Dentibus Elephantum, aliarumque Belluarum in America Septentrionali, aliisque borealibus Regionibus obviis; qua indigenarum Belluarum esse ostenditur. Auctore R. E. Raspe, Serenissimo Hassiarum Landgravio à Consiliis, et R. S. S.*

SOCIETATI REGIÆ SCIENTIARUM
LONDINENSI.

Read May 11,
1769. **P**ERSCRIPSIT ad me illustres
Pringlius, baronettus: “ Media nu-
“ per in America Septentrionali, non procul ab
“ Ohio fluvio, intra spatium duorum aut trium
“ jugerum terræ paludosæ, sale fœcundæ, sceleta
“ triginta belluarum majorum inventa fuisse, nulla
“ aut rara terra solum sepulta: Si magnitudinis
“ ossium atque dentium majorum habeatur ratio, ele-
“ phantina videri; ob formam molarium dentium,
“ qui carnivori potius sint animalis, ambigi cui bel-
“ luarum speciei tribuenda; quæri inter naturæ stu-
“ diosos de phænomeni causis; pro sua in me bene-
“ volentia et meam rogare sententiam.”

Hanc dissertationem, quamvis difficultates quæstio-
nis magis ostendat quam solvat, malui judicio vestro
potius

potius subjicere quam dare aliud quodvis studiorum meorum documentum.

Duplex proprie est quæstio; altera, “ de causa, “ quæ harum belluarum ossa in Americam Septentrionalem transvexerit?” Altera, “ quæ in tam brevi spatio concluderit et sepelierit?”

Primam soluturo occurrit:

1. Historicorum Americæ constans observatio, omnem hanc novi orbis terram, cum tribus fere abhinc seculis detecta Europæis patere cœpit, nonnisi à quadrupedibus minoribus fuisse habitatam; peregrina igitur videri illa, sive elephantum sive aliarum belluarum colossalia sint ossa.

2. In mentem redeunt ossa majora in Asiæ aut Sibiriae borealibus regionibus inventa et obvia, quæ subterraneo lucifugo animali, quod Mammout dicitur, tribuit fabula, elephantis aliisque belluis vindicant commentarii Petropolitani et Gmelinus in Itinerario Sibirico. Nec in Asiæ et Americæ solum borealibus provinciis ea occurrunt, effodiuntur etiam in Europæ climatibus septentrionalibus.

De Britannicis huc pertinentia quædam in Transactionibus vestris legisse memini. De Suecia fidem faciunt Holmienfis academix commentarii. Ex Germaniæ naturali historia minus vulgatas aliquot observationes addere liceat.

Nil moror gigantum ossa, quæ credula antiquitas spectanda servavit in cathedralibus quibusdam templis, ut Halberstadenfi, Ganderstæmensi, aliisque. Huc facere quidem videntur, sed certiora repeto et primo quidem ex electoratus et ducatus Bransvicensis naturali historia, diligentius olim à me perscrutata. Recordemini ossium in antris Baumanniano, Schartzfeldensi, et prope Dünam

nam in Hercynia effossorum. Ea scriptis eruditorum Leibnitzii in *Protogæa* et Hollmanni in Commentariis Goettingensibus celebrata sunt, atque cuilibet inspectanti belluarum majorum terrestrium esse videntur, ex parte rhinocerotum ossibus persimilia ab Hollmanno demonstrata sunt. Dentem majorem, elephantinis forma et substantiæ textura exacte convenientem et ad Fischbeckam prope Hamelam ad Visurgim inventum, quem Hannoveræ in instructissimo suo museo servat mihi amicissimus Andreae, plus una vice manibus versavi. Vidi etiam Blumenauiæ prope Hannoveram effossam majorem costam incerti animalis. De specie belluæ majoris ad Quedlinburgum effossæ, cujus meminit Guerickius Magdeburgensis consul in libro *de vacuo*, quam maxime anceps est quæstio. Certius pronunciare licet de dentibus, in fundamentis jaciendis urbis Neo-Cassellensis, quam nunc inhabito et per Serenissimi Landgravii Hassiarum in me cumulatam et liberalitatem et gratiam alteram prædico patriam, effossis. Isti elephantini sunt; et cum aliis naturæ et artis miraculis in museo publico, mihi ex parte concredito, servantur. Plura non addo exempla, non quod deficiat materies, nam et antiquitas Græca et Romana et quicquid fere est cultiorum populorum similia adnotavit; adducta vero sufficiunt ad probandum “ in
 “ omnibus borealibus regionibus et antiqui et novi
 “ orbis inveniri majorum belluarum ossa, quæ vivæ
 “ in illis non supersunt, et per cœli inclementiam
 “ nunquam in illis generassè videntur.”

3. Subit accuratius perpendendus situs et natura soli in quibus apprehendi solent.

In

In stratis lapideis, corporibus marinis mixta, inclusa, tecta inveniri nusquam legi.

Delitescunt in cavernis montium ut in tribus illis Hercyniæ antris; aut palude, aut terra hortensi, aut limo exterioris superficiei terræ vix contacta atque involuta jacent, quod de Americanis, Sibiriacis, aliisque, ex relationibus fide dignis, constat.

Nec etiam, ut corpora marina faxis inclusa, lapidis duritiem et naturam induerunt. Diversimode calcinata, parum aut nihil mutata sunt.

In Europæ septentrionalibus plagis rarius jam et solitaria fere deteguntur, forte quod exhausta curiositatis materies, et quod diutius habitata a populis miraculorum et medicamentorum appetentibus, nam ossa hujusmodi, eboris aut unicornu fossilis nomine, in officinis pharmacopœorum prostant, et nescio quam illis antidoti mirabilem vim tribuerat antiquitas.

In ipsis quoque Americæ et Sibirix terris, habitatione marinarum corporum in lapidem versorum immensæ copix, rariora sunt; et minor utique belluarum terrestrium progenies in natali earum terra, quasi secus non suffectura, observata fuit.

Quæ omnia si recte animo colligantur duplicem eamque ad rem facientem suspensionem movent; alteram “ alio plane modo hæc ossa sepulta esse, quam
“ quæ profundius in lapidibus latent corpora marina; alteram non esse peregrinas et marinas belluas
“ hæc, quarum sunt partes, sed fato suo, aut hominum vi, illas in ipsis hisce borealibus terris,
“ olim illis natalibus, extinctas fuisse.”

Quæstio igitur proposita, jamque solvenda, est de generali quadam causa, quæ has belluas, aut sub sole

tantum calente degentes, in Septentrionem transfu-
lerit, aut exstinxerit similes illis species olim Septen-
trionis incolas.

Si peregrinas alioque advectas et cœli solùm calidioris
progeniem statuamus, omnis definitio periculosa videtur.

Terræ motuum et Vulcanorum vis, quæ insulas pro-
duxit et montes, et rationem sufficientem reddit strato-
rum lapideorum, variè inclinatorum et ruptorum,
illisque inclusorum marinorum corporum, nil valet ad
advehendas orientis et meridiei bestias. Superficiem
terræ fundique marium mutat. Climata inconcussa
manent.

Diluvii universalis Noachici aut Deucalionei cu-
jusdam effectibus, præter alia multa, quod supra no-
tavi, obstat, ossa hæc vel in cavernis montium, solitis
ferarum latebris, aut paludibus aut superiore solum
terra, solitaria quadammodo, nunquam corporibus
marinis tecta, mixta, inclusa deprehendi. Nec etiam,
quæcunque tam mirabili aquarum super omnem con-
tinentem effusioni tribuatur vis et potentia, concipi
animo potest, quare ossa et cadavera hæc graviora ex
meridionalibus regionibus in septentrionales trans-
vexerit, eaque in alta potius mediaque continente
terra deposuerit, quam in oceani abyssis, nisi forte
cum Woodwardo perplaceat diluvii tempore nullam
omnino gravitatis fuisse actionem, quod quidem per
me licet, neminem vero vestrum rapiet in assensum.

Si recurramus ad antiquitatis remotissimæ heroas,
belluis uti belli instrumentis utentes, easque invitas
cum militibus suis æque forte invitis in ultimam Eu-
ropam, Sibiriam, atque Americam vi, metuque prop-
ellentes, quæstionem non solvimus sed impedimus.

America enim toto oceano ab antiquo orbe divisa, et quicquid dicant veteres, navalis eorum scientia exercitiis cum elephantis in Americam ex Asia aut Europa transvehendis non sufficit. Quatenus etiam lux est in antiquorum temporum historia et moribus, sero quadrupedes in bellum domarunt, elephantos primò nonnisi Asiæ et Africæ reges. Tenebris vero historiarum, quæ maximam antiqui orbis partem premunt, ad fabulas novas fingendas meo quidem iudicio abuti non licet, nisi forte de quibuscunque historiæ et orbis terris incognitis impune mentiri liceat.

Peregrinas igitur non esse nec aliò advectas has Septentrionis belluarum majorum reliquias quammaxime prona est conjectura; idque et illi sensere, qui climata terræ mutata, eoque ipso omnem controversiam definiri posse putarunt. Vereor autem ne eorum hypothesen, nimio autorum ingenio, collapsuræ sint.

Climata terræ, eodem orbitæ, qua circum solem revolvitur, diametro servato, duplici modo mutari atque affici posse videntur; aut magis imminuta istius orbitæ sive ecliptices obliquitatem magisque ad planum æquatoris inclinata; aut axeos terræ centrique gravitatis sumpta quadam mutatione, quæ cum climatibus simul et terræ figuram mutat.

Prior hypothesi mirè arrisit recentioribus quibusdam philosophis, tum quod problema propositum apparenter solvat, tum etiam quod talis quædam orbitæ vel ecliptices inclinatio ejusque obliquitatis diminutio revera accidit, si quidem Eratosthenis atque Hipparchi, novemdecim ab hinc seculis institutis, observationibus sua fides constat. Illi eclipticam ab æquatoris plano suo tempore $23^{\circ} 51' 20''$ recedere notarunt,

runt, quam celeberrimus De la Caille nostris diebus 22' 59'' $\frac{1}{2}$ minorem observavit in Promontorio Bonæ Spei, uti quidem notavit in *Leçt. Elem. Astron.* Nolo contra antiquarum observationum fidem disputare, nec repetere quæ de incertitudine annuarum legum hujus imminutæ ecliptices obliquitatis et de causa ejus non perpetua, inter astronomos disputata sunt. Concedam potius multo majorem olim fuisse ecliptices obliquitatem; ipsa vero mea in hujus hypotheseos patronos liberalitate vincam. Quamcunque enim majorem orbitæ obliquitatem fingere velint, nunquam tamen eò evitabunt necessariò inde provenientes tempestatum anni vicissitudines, naturæ elephantorum quammaxime contrarias. Extendant tropicos ad quinquagesimum et ultra latitudinis gradum; intendant quantum velint calorem æstivum, et certe magis intensus fiet majore orbitæ obliquitate, et magis directe solis radiis in zonas, quas inhabitamus, incidentibus, quid elephantis, quibus illa hypothesi in nostris regionibus commodas, et vivendi et generandi sedes parare satagunt, inde commodi? Non equidem video: sentio potius, idque sphæroïdea terræ figura ipsaque major ecliptices obliquitas cuilibet perpendiculari facile persuadebit, majorem hunc æstivum calorem, constante semestri vicissitudine, majus etiam frigus hibernum infecuturum, quod tantum abest ut elephantorum naturali progeniei in zonis borealibus conveniat ut potius illi quammaxime obstat.

Quod ad axeos terræ centrique gravitatis mutationem attinet, ea aut momentanea esse debuisset, aut lenta, et per gradus successiva.

Si prius; hypothesis cælum Acherontaque movet, summa miscet imis, omnemque hominum et animalium

lium viviparorum progeniem fato subitæ mortis, et sine miraculo inevitabilis involvit, in perpetuum interituram et sine novo creationis miraculo non reviviscendam; ejusmodi enim mutatio, quæ meridionales zonas olim inter tropicos sitas uno temporis momento boreæ objiciat, sine universali terræ ruina exitiali cogitari nequit, si, quod verissimum demonstravit Newtonus, rotatio orbis polos deprimit æquatorem pandit, diameterque terræ per polos ductus minor sit altero æquatoris septem et quod excurrit milliaribus Germanicis. “ Quis talia fando temperet à lacrymis!” Tam violenta etiam climatum mutatio boreæ olim incolarum cadavera sub æquatorem in meridionales terras transvehere debuisset, quod an experientia confirmetur viderint alii quibus hæc arrident.

Sed lento gradu procedere potuit illa figuræ terræ, climatum et axeos mutatio? Concedam. Sed quare non amplius procedit? Quis impedit ne, certo quodam et procedenti axeos mutationi respondente progressu, meridionales plagas cum terræ trepitatione et mugitu versus boream procedentes paullatim deprimat et mergat, boreales vero ad meridiem jam tendentes extollat oceano? Constantes sibi fingamus naturæ leges aut nullas. Non enim senescit.

Redeo igitur ad illam, quam supra jam indigitavi, suspensionem, suo fato, aut hominum vi, obiisse beluas, quarum ossa nos exercent, ubi deprehendimus, nec peregrinas esse, nec marinas. Ea sola minoribus difficultatibus laborat. Quamvis enim nec climata, nec axem terræ, nec ejus figuram mutandam propterea censeam, sunt tamen quædam quæ obstare illi videntur, quo minus pro generali aliqua phænomeni
propositi

propositi causa haberi possit; sed obstare tantummodo videntur.

Maximam difficultatem hoc parit, pro elephantinis aut meridionalium belluarum ossibus haberi; Septentrionem et omnem Americam elephantos similisque voluminis animalia non generare; et si animalium et climatum natura constans sit, et perpetua, nunquam generasse.

Totius igitur quæstionis cardo versatur circa naturam horum ossium: an reverà elephantina aut talia sint, quæ animali in septentrione degenti convenire non possint? Et mihi quidem plus quam indecisa videtur illa ossium natura; certè elephanto vindicari non possunt molares dentes, simul cum reliquis in America eodem loco inventi; nec etiam alia ossa in Sibiria et Hercyniæ cavernis obvia illi conveniunt, quod accuratius perlegenti commentarios Petropolitinos et Gmelini itinerarium, et sine præconcepta opinione inspectanti ossa, sat clarum erit. Si per anatomicam omnium quadrupedum imprimis belluarum inter se comparatam, habito respectu ad diversas illarum ætates, quæ ossium formam mutant, constaret, nullum cujuscunque animalis os alteri convenire et convenire posse, quod non constat; tum quidem coactus confiterer re verà elephantina esse quæ videntur, reliqua quæ elephantina non videntur adscribenda speciei nondum nec in India nec alibi terrarum observatæ. Quod an difficultates omnes expediat judicate ipsi; ne enim repetam cum nulla hypothese elephantorum meridionalium sub septentrione ossa conciliari posse, ane admittenda erit alia belluarum species nondum observata, cui molares dentes elephantis non

non convenientes adscribantur? Species forte nullibi superstes, si quidem nobis datum est omnes nosse, omnes ritè descripsisse? Extirpata fortè aut emortua? Aut etiam nescio in quo mundi angulo, philosopho nulli viso, adhuc delitescens?

Quæ cum ita sint, licere mihi puto omnia hæc septentrionis colossalia ossa uni solum speciei incognitæ, olim septentrionis incolæ, aut adscribere etiam diversis. Tum me reliquarum hypothesium omnium defectus non vexabunt, et magnis me difficultatibus me explicuisse putabo——“ forte ut incidam in Scyl-
“ lam volens evitare Charybdim,” quod vestrum iudicium esto.

Integras ferarum species in Britannia, Germania, aliisque Europæ provinciis penitus extirpatas, aut quam proxime emorituras ipsi nostis, aut quod no-civæ habitæ fuerint, aut in pellibus et carnibus earum luxuriatum sit genus humanum. De lupis, ursis, alce, uro, plerisque, Cæsaris ævo, in Germania Rhe-nana obviis sermo mihi est. Quidni igitur noxiam aliquam belluæ speciem, rarius generantem per lon-gam seculorum seriem excindere potuisset septentri-onalium populorum ab omni historiæ memoria cele-bratum venationis et bellicæ fortitudinis studium? Certe ea via ad gloriam ibant omnes, et Herculem et quem-vis primi seculi heroa acrem monstrorum debellatorem cantat fabula. Castorum et zibellinorum speciebus simile quid nostris ferè diebus accidit, eoque minus de almæ naturæ lege, species omnes servante, contra me disputari potest; et in seculo quidem pluribus animantium speciebus fatali, et ab homine in omnium ferè specierum individua sævo. Species etiam in septentrione non superstitēs supereffe possunt in zonis
antarcticis

antarcticis nostris borealibus parallelis. Quis negat? quis novit?

Elephantorum Africæ, Indiæ, et Ceylanensium diversitatem quandam notant naturæ historici, Ceylanenses reliquis omnibus magnitudine et ingenio præcellere prædicantes. Esse igitur potuit elephantorum species in ipso septentrione, reliquis omnibus præcellens frigoris patientia, et à meridionalibus elephantis non magis diversa quam Lappones aut Hurones diversi esse solent a Nigritis et Malabaricæ incolis. Sed certi quid pronunciare non ausim. Sufficit, omnium reliquarum hypothesium insufficientiam, naturam situs et ossium ipsorum, tandem etiam exempla exstirpatarum specierum persuadere, quammaximè probabili quadam ratione, belluas quarum ossa in septentrione hinc inde latent, non esse peregrinas, non aliò advectas sed indigenas in illis terris, ipsis olim natalibus, vixisse, generasse, quamvis hodie non supersint.

Altera jam quæstio de causa, quæ tam ingentem sceletorum atque ossium acervum in tam brevi Americæ Septentrionalis spatio concluderit et sepelierit? quammaxime est expedita. Latebant in terra paludosa, sale fœcunda, rara solum terra tecta; non quod hæ belluæ de salinarum, dominio et proprietate humana quadam arte et crudelitate, invicem debellarint et fortitudine sua ceciderint in fundo ad præliandum quammaxime incommodo, quod videri poterat primo obtutu et jocabundo cuidam amicorum meorum videbatur; sed quod salis liguriendi deliciis in paludem allecæ, paludosa terra ponderi corporis cedente, haustæ, impeditæ, sepultæ fuerunt, luxuriam et voluptatem morte luentes.

Hæc

Hæc fere sunt quæ ad solvendas aut impediendas supra nominatas quæstiones mihi quidem dici posse videntur, elegantius forte et doctius dicenda, si magis verborum limatorum illecebris munerumque pretio atque pondere quam dantis et scribentis animo deliniendi et capiendi foretis. Illum vero vobis addictissimum testor, sincera vota pro vestræ Societatis incolumitate et flore fundentem, vestræque salutis et veritatis omnis cupidissimum.

R. E. Raspe.